

宋史新編

宋史新編卷一百九十三

列傳一百三十五

明南京戶部主事莆田柯維騏著

遼國下

耶律曷魯字控溫一字洪隱夷离董偶思之子質厚有謀阿保機信任之事必諮而後行曷魯每戰身先士卒或設奇掩擊故連克烏古軍韋諸部奚部攻不下親抵其壘說降之常贊阿保機得聖人符瑞阿保機遂稱帝命曷魯總軍國事以討平刺葛之亂加授如其父官時民更兵燹頗抗敝曷魯綏輯有方畜牧繁滋國以富庶兵威益振拜爲阿魯敦于越阿魯敦者盛名也自是伐

西南夷皆爲先鋒及圍幽州還得疾卒遼主悼甚葬爲
立石紀功又爲立祠上京開國凡二十一功臣各有所
擬以曷魯爲心以蕭敵魯爲手以阿古只爲耳蕭敵魯
兄阿古只弟皆北府宰相也他如耶律斜涅赤爲北院
夷离堇其姪老古爲右皮室詳穩並在功臣列老古弟
頗德爲南院夷离堇以彊直見重云

韓延徽字藏明幽州人刺史夢殷之子仕梁爲本州觀
察使支使出使爲阿保機所留召與語合旨立命叅軍
事延徽爲畫策攻下諸部落漢人降者樹城郭立市里
以居又定配偶教懇藝生養之以故少逃亡一日亡歸

阿保機如失左右手已復走遼曰忘親非孝棄君非忠
故去而復來阿保機大悅卽命爲守政事令崇文館大
學士當初元草創凡營建禮儀百度井井皆其力也天
贊四年以同破渤海功拜左僕射又與康默記攻長嶺
府拔之延徽在佐命功臣列歷事德光阮累官封魯國
公南府宰相致仕卒贈尚書令世爲崇文令公子德樞
孫紹芳裔孫資讓並窮極爵位紹芳之兄紹勳官東京
戶部使會大延琳叛被執不屈賊以鋸解之憤罵至死
康默記本名照少亦漢人也爲薊州衙校阿保機侵薊
州得之愛其才以隸麾下一切蕃漢事折衷悉合旨時

諸部新附文法未備默記推析律意人人自以爲不冤
拜左尚書後爲皇都夷离董累有軍功在功臣列孫延
壽以功至保大軍節度使

高模翰一名松渤海人有膂力善騎射阿保機平渤海
模翰避地高麗王妻以女因罪亡歸坐使洒殺人繫獄
阿保機知其才賞之德光援石敬瑭挫唐兵連下諸州
實模翰統師德光曰朕自起兵百餘戰卿功第一乃授
上將軍及晉背盟出師南伐下關南城邑數十又屢敗
杜重威之師德光獎曰朕憑高觀兩軍接戰見卿勇銳
如鷹逐雉免當圖形麟閣貶爵後裔及重威降德光滅

晉模翰自太傅加特進檢校太師封愜郡開國公歷事
阮及璟官至中臺省左相先是召爲右相東京父老皆
歡迎嘆爲鄉里榮論者謂功名始終爲時良將云同時
有趙思溫者字文美盧龍人初爲晉王李存勗驍將降
遼累立戰功至臨海軍節度使加檢校太師贈太師魏
國公二子俱至使相

張礪磁州人初仕唐爲翰林學士會遣將討石敬瑭援
張敬達以礪爲招討判官敬達敗礪入遼德光見礪剛
直有文彩如其本國官之礪臨事必盡言無所避由是
益見重未幾亡歸追之還德光責之對曰臣不習北方

土俗飲食居處常鬱鬱德光顧通事者曰朕嘗戒善遇此人乃令失所耶杖之而謝礪會同初擢翰林承旨兼吏部尚書從德光入汴滅晉諸將蕭翰等肆殺掠遠近思叛翰被命爲節度使守汴礪奏宜用中國人以安人心德光不聽翰聞而怨之改右僕射兼門下侍郎平章事德光卒于灤城礪在恒州翰以兵逼脅而數其離間勳戚之罪曰今必殺汝趣令鎖之礪抗聲曰國家大體安危所繫我實言之欲殺卽殺何鎖爲翰不果殺是夕礪恚憤卒

耶律吼字曷魯端慤好施不事生產德光特加倚任會

同六年爲南院大王蒞事精簡人不敢以年少易之從
伐晉入汴諸將皆取內帑珍異吼獨取馬鎧德光卒于
途無遺詔軍中咸憂懼吼詣北院大王耶律洼議曰天
位不可一日曠若請於太后恐屬李胡暴戾殘忍詎能
予民必欲厭人望則當立永康王洼然之會宿衛耶律
安搏來議與吼合且贊其決吼與洼整軍召諸將令曰
永康王人皇王之嫡長天人所屬當立有不從者以軍
法從事諸將皆曰諾永康王旣立吼以功加採訪使賜
以寶貨吼辭曰臣位已高敢復求富臣族子坐事籍沒
陛下見原臣受賜多矣許之仍賜宮戶五十時有取當

世名流作七賢傳者吼與其一年僅三十九卒吼之被
賜擢也洼亦賜宮戶五十拜于越安搏賜奴婢百口仍
宿衛又拜北院樞密使其功同也厥後安搏事頗縱弛
察割兵犯主帳不能討爲中外所短應曆中以前定策
故不復委用竟坐誣下獄死

耶律屋質字敵輦性簡靜有器識重然諾遇事造次從
容處之人莫能測又搏學諳天文會同間爲惕隱當迷
律與李胡率兵拒末康主阮于潢河屋質實從白曰
后宜思長策盍與約和因遣屋質授書於阮責其自立
阮遣宣徽使耶律海思復書辭多不遜屋質諫曰大主

宜遜謝太后以安社稷且陳倫誼事勢以感悟之乃許
與太后相見先遣海思往往返數日議始定既相見怨
言交讓殊無和意屋質復委曲辨諭各回其不平心述
律謂屋質曰和議定神器將安歸屋質曰太后若授求
康主順天令人李胡猶不從屋質曰公暴戾殘忍萬人
怨讟咸願立求康王不可奪也述律然之遂罷兵臣僚
戚屬先爲李胡所執者竝獲免天祿二年耶律天德等
謀爲亂屋質奏不宜輒恕卽委訊天德伏誅三年表列
秦寧王察割陰謀事不聽五年察割果行弑屋質協力
討賊遣弟冲迎立壽安王璟旣立命屋質知國事盡以

逆黨財產賜之屋質固辭應曆五年爲北院大王總山西事保寧初帥兵援太原拒宋師以功加千越明年卒年五十七子唐古事宗真至節度使積粟練兵邊境晏然上疏乞勒父功于石從之屋質同時有耶律撻烈者爲南院大王俱有政迹朝議以爲富民大王云海思應曆末坐謀叛死獄中

耶律賢適字阿古直子越魯不古之子嗜學有大志于越屋質器之事遼主璟及賢累有功歷節度使北院樞密使兼侍中兩賜功臣號賢適忠介膚敏推誠待人雖燕息不忘政務故百司罔敢媮墮累年滯獄悉決遣大

丞相高勳等席寵納賂門若賈區賢適以聞不報謝病解職又不允令鑄手印行事乾亨初得請封西平郡王同時有郭襲者性端介識治體保寧中爲南院樞密使加兼政事令上書諫罷游獵爲生靈社稷計被獎賜協贊功臣拜武寧軍節度使卒

耶律隆先字團隱東丹王倍之子阮之弟也倍小字圖欲讓國奔唐事在德光傳中唐明宗以莊宗后夏氏妻之賜姓東丹名慕華改姓李名贊華歷拜節度使鎮滑州性卞急婢妾微過輒剗灼夏氏懼求削髮爲尼倍後爲李從珂所害子阮有國謚曰讓國皇帝後累加謚廟

號義宗隆先保寧元年封平王既又兼政事令留守東京薄斂自刑薦賢恤下同討高麗有功還卒隆先爲人聰明博學能詩有閨苑集行世弟道隱性沉靜有文武才歷南京留守號令嚴肅民獲安業封至荆王追封晉王隆先子陳哥與渤海官屬謀弑父事覺車裂之

耶律合住字粘衮遼主近族也知而有文曉暢我政每從征有功保寧中宋師屢警拜涿州刺史西南兵馬都監招安巡檢使務鎮靜不妄邀功嘗領數騎徑詣雄州北門與郡將立馬陳兩國利害及周師侵邊本末辭氣慷慨左右壯之自是疆圉數年無事識者謂合住一言

賢於數十萬兵旣而宋數遣人結驩令住爲達和意安邊睦鄰其力居多

室昉字夢奇幽州人自少謹厚篤學不出外戶者二十
年會同初第進士歷仕天祿應曆保寧間爲翰林學士
南京副留守累遷樞密使兼北府宰相加同政事門下
平章事統和初告老不許進尚書無逸篇以諫是時昉
與韓德讓耶律斜軫相友善同心輔政釐析蠹弊知無
不言務在息民薄賦以故法度脩明朝無異議八年昉
復請致政詔入朝免拜賜几杖封鄭國公加政事令病
劇授中京留守加尚父卒贈尚書令遺言戒厚葬恐人

魯過情自志其墓云德讓斜軫當宋遼爭衡之際摧鋒
略地皆爲名將斜軫歷北院樞密使加守太保從承天
南伐卒于軍中德讓賜姓名耶律隆運後拜大丞相封
齊王改晉王總二樞府事卒贈尚書令諡文忠

邢抱朴應州人刑部郎中簡之子與弟抱質幼孤受經
于母陳氏後皆以儒術顯抱朴仕保寧統和間歷戶部
尚書翰林學士承旨拜叅知政事奉詔按覈諸道守令
能否大協人望兩決南京滯獄人無冤者改南院樞密
使贈侍中抱質亦至侍中時人榮之陳氏貞靜柔順
儀兼備其卒也詔刻石表其行遣使諭祭云

馬得臣幽州人好學博古善屬文尤長於詩立朝以正直稱統和初自翰林學士承旨兼侍讀學士又兼諫議大夫知宣徽院事上書引貞觀開元事以勸睦親講學及罷毬馬之戲隆緒嘉歎良久卒贈太子太保同時有蕭朴者亦起身文學事在宗真傳中終南院樞密使封魏王卒贈齊王

耶律休哥字遜寧祖父俱顯休哥初爲惕隱當應曆乾亨間適宋太宗滅漢乘潘美銳師長驅取燕遼將屢敗獨休哥高梁之戰大捷明年瓦橋之戰又捷遼主獎之曰尔勇過於名拜爲于越統和初命總南面軍務以便

宜從事休哥均戍兵勸農桑疆境大治四年宋復遣曹彬等分道來伐休哥大敗之于岐溝事詳遼主傳中休哥收岐溝宋屍爲京觀封宋國王未幾又兩敗宋師自是宋寢圖燕志矣休哥以燕民疲弊加意振恤戒戍兵無犯宋境馬牛逸于北者悉還之遠近向化邊氓按堵十六年卒詔立祠南京休哥料敵如神每讓功諸將故人樂爲之用身更百戰未嘗殺一無辜二子高八至節度使高十終于越孫馬哥亦至節度使

耶律海里孛留隱天祿察割之亂其母的魯與焉遣人召海里海里拒之亂平的魯以子故獲免海里儉素不

喜聲利以射獵自娛雖居閒人敬之如貴官然保寧初自節度使遷楊隱秩滿稱疾不仕久之復爲南院大王同諸將禦宋師有功賜資忠保義匡國功臣遼主屢親征海里在南院十餘年鎮以寬靜戶口增給封郡王遷上京留守卒以家貧給葬具

蕭繼先字楊隱尚主拜駙馬都尉歷事隆緒拜北府宰相繼先雖處富貴不改儉素所至以善治稱故將兵攻戰未嘗失利名重戚里

張儉宛平人統和十四年進士第一調雲州幕官端慤達世務故事遼主出幸州邑長吏常有獻是時隆緒獵

雲中州節度使奏臣境無他產惟慕僚張儉一代之寶
敢以爲獻隆緒嘗夜夢四人侍側賜食人二口至聞儉
名悟而召之占奏三十餘事稱旨遂加顧遇踐清華太
平六年拜左丞相封韓王未幾受遺詔輔嗣君宗真旣
卽位賜儉貞亮弘靖保義守節耆德功臣拜太師中書
令加尚父徙王陳儉衣惟絀帛食不重味俸餘以周親
舊宗真憐其貧命恣取內府物儉惟持布三端而出又
欲賜其弟五人進士第儉固辭在相位二十年裨益爲
多年九十一卒

耶律鐸軫字敵輦仕統和開泰間多戰功至節度使及

西征捷歸遼主隆緒親賜卮酒仍問所欲對曰臣幸被聖恩得効駑力萬死不能報國又將何求隆緒愈重之手書其衣裾曰勤國忠君舉世無雙

蕭孝穆小字胡獨董女主耨斤之弟孝先孝友之兄也歷官北府宰相南京東京留守北院樞密使嘗累將兵禦敵討叛有功兩賜功臣號進封吳王重熙九年徙王楚時四方無事戶口蕃息遼主宗真欲一天下謀取三關集羣臣議南院樞密使蕭惠贊之曰宋人西征有年師老民疲陛下親帥六軍臨之其勝必矣宗真以爲然孝穆歷歷述祖宗興兵結好之利害以諫且曰宋人無

罪不可棄先帝盟約不聽以老乞骸骨不許更王齊卒
贈大丞相晉國王諡曰貞孝穆雖以貴戚重然始終廉
謹循禮法妻子亦無驕色宮中每有賜輒辭所薦拔皆
忠直士時大臣多親細務失大體沿襲已久孝穆語人
曰樞密選賢而用何事不濟又曰不能移風易俗偷安
爵位臣子之道如是平時稱爲國寶臣目其文曰寶老
集子阿刺撒八阿刺字阿里歷駙馬都尉北院樞密使
累封陳王與蕭革同掌國政革諂諛不法阿刺爭之不
得告歸遼主洪基自是惡阿刺竟爲革中傷縊殺之阿
刺性忠果曉世務有經濟才議者謂阿刺若在必無重

元乙辛之亂撤八字周隱尚主歷北院宣徽使重熙末
出爲西北路招討使武寧郡王撤八持行類其父居官
以治稱卒追封齊王

孝先字延寧尚主歷北院樞密使封楚王釋斤弑齊天
謀廢立孝先皆預聞竟以釋斤故免譴重熙四年徙王
晉爲南京留守卒謚忠肅孫得里底爲樞密使坐誤國
死語在天祚傳

孝友字撻不衍歷北府宰相上京東京洛京留守拜中
書令加尚父累賜功臣號進封豐國公坐子胡覲與重
元作亂伏誅胡覲尚主歷同知北院樞密事事敗投水

死五子同日誅之

劉六符河間人唐盧龍節度曄之六世孫曾祖守敬祖景皆仕遼爲南京留守景忠實優文學終武寧開遠二節度使兼侍中父慎行初歷北府宰相多匡救終彰武軍節度使六符與兄三嘏四端先後第進士六符重熙初擢翰林學士同北院樞密副使耶律仁先使宋宋竟增歲幣易十縣定名曰歲貢語在富弼傳加同中書門下平章事宋幣至命爲三使受之或言六符受宋賂出爲長寧軍節度使已復召爲三司使卒論者謂六符啓釁邀功玷其門閥云按伐宋取十縣實樞密使蕭惠統

兵且嘗贊其議語在蕭孝穆傳及增幣惠以首功進封韓王後伐夏大衄亦不之罪致仕封魏王歲時賜賚不絕惠與六符其失均然惠以廉名

楊佖字正叔幽州人進士第一開泰中累遷翰林學士文章號得體燕饑疫多流殍以佖同知南京留守事發虜振乏鬻子者計傭出之重熙中歷參知政事兼知南院樞密使復出爲武定軍節度使時久旱苗槁佖視事之夕雨沾足百姓喜而歌之灤陽水失故道以已俸創長橋人不病涉及被召郡民攀轅泣送遼主御殿宴勞之卽日除吏部尚書兼門下侍郎同中書門下平章事

卷一百一十三
三
信以進賢爲已任事總大綱責成百司人人樂爲之用
致政卒有登瀛集行于世

耶律韓八字嘲隱布衣時隆緒微服出獵遇與語識其
才會北院奏南京疑獄久不決卽召韓八以審錄委之
朝士皆愕韓八量情處理人無冤者自是頗信任宗真
立歷左夷離畢北院大王忠謹多補益死之日篋無售
蓄施無新衣官給葬具平生不屑細務喜愠不形嘗失
所乘馬僮以同色者代之數月不覺

蕭韓家奴字休堅中書令安搏之孫少好學博覽通遼
漢文字爲彰愍宮使宗真與語才之命爲詩友嘗從宗

問曰卿居外有異聞乎對曰臣惟知炒栗小者熟則大者必生大者熟則小者必焦使大小均熟始爲盡美蓋嘗掌栗園故託以諷諫宗真大笑宗真制問省後補役恤民弭盜之策韓家奴對千餘言人曰遼之鼎鼐也擢翰林都林牙兼脩國史暇日飲酒賦詩相醺酢君臣相得無比上疏請倣唐高祖之制尊阿保機之父以上四代爲皇帝於是始行追冊二祖之禮有司奏獵秋山熊虎傷死數十人宗真見韓家奴書于冊命去之旣出復書他日宗真見之曰史筆當如是宗真問祖宗以來孰爲賢主韓家奴曰穆宗賢宗真不以爲然韓家奴對曰

穆宗雖暴虐省徭輕賦人樂其生無罪被戮未有過今日秋山傷死者其每事規諷如此與耶律庶成兩被詔錄遙輦可汗至重熙事迹二十卷自天子達於庶人制爲典禮三卷又詔譯諸書韓家奴譯通曆貞觀政要五代史欲其知古今成敗也拜歸德軍節度使以善治聞遣使問勞召脩國史卒有六義集十二卷行于世

蕭陶隗字烏古隣宰相轄特六世孫咸雍初任馬群太僕陶隗素知群牧名在實亡悉閱舊籍除其羸病錄實數奏爲定式太康中累遷契丹行宮都部署耶律乙辛有寵於洪基已害儲嗣濬因薦宗室淳陶隗諫曰有嫡

在不可以國與人洪基嘗謂群臣曰北樞密院久闕耶
律阿思蕭幹特刺二人孰愈群臣各譽所長陶隗獨默
然洪基詰之對曰幹特刺懦而敗事阿思才而貪將爲
禍基不得已用敗事徇勝基禍不聽卒用阿思阿思銜
之九年出爲西南面招討使阿思陰與蕭阿忽帶誣奏
其縱賊當死詔免官久之起爲節度使未行疽發背卒
陶隗剛直負氣怒則須髯輒張每有大議必毅然決之
雖遼主有難色未嘗遽已見權貴無少屈故得罪云
耶律仁先字紉鄰南府宰相瑰引子也魁爽有智略受
知宗真仁先以爲不世遇言無所隱使宋鎮邊皆有功

歷北院樞密使東京留守封吳王洪基立兩爲南院樞密使更王許清寧七年洪基獵太子山太叔重元與其子涅魯古等謀逆洪基趣仁先捕之未及介馬重元兵犯帷宮洪基欲走北南院仁先曰若舍扈從而行賊必躡其後且南北大王心未可知仁先子撻不也曰聖意豈可違乎仁先怒擊其首洪基悟悉委仁先討賊事仍環車爲營折行馬爲兵仗率官屬三十餘騎陣柅外及交戰賊衆多降涅魯古中矢墮馬斬其首重元被傷而退仁先以五院部蕭塔刺所居最近亟召之分遣人集諸軍黎明重元復率衆八二千犯行宮蕭塔刺奔適

至仁先料賊勢不能久俟其氣沮攻之乃背營而陣乘
便奮擊賊衆奔潰追殺二十餘里重元與數騎遁去洪
基執仁先曰平亂皆卿之功也加尚父進封宋王爲北
院樞密使詔畫灤河戰圖以旌之咸雍元年加于越改
封遼王與耶律乙辛共政乙辛恃寵不法仁先抑之由
是見忌出爲南京留守改王晉恤孤惇禁奸慝議者以
爲自于越休哥後惟仁先一人而已弟義先信先義先
性剛直有禮法歷拜惕隱封郡王信先終南面林牙宗
真嘗以其父魂引爲刺血友故信先自幼養于宮父以
信先請得封燕王撻不也至節度使太康中爲西南面

招討使阻卜誘殺之

耶律玠字吾展重熙十年爲樞密副使咸雍初兼北院副部署及遼主弟秦國王爲西京留守請玠爲佐歲中獄空者三召爲敞隱玠不喜貧殖洪基知其貧賜宮三十嘗謂宰相曰契丹忠正無如玠者漢人則劉仲而已然熟察之玠優於仲同時節度使耶律僕里篤知興中府亦以獄空聞所至皆稱職云

劉仲字濟時宛平人第進士爲大理正因奏獄宗直適與近臣語不顧仲進曰臣聞自古帝王必重民命願陛下省臣之奏宗直大驚異仲明法而恕歷大理卿西京

留守又提點大理寺凡寃獄全活者衆及爲崇義軍節度使政務簡靜民用不擾致烏鵲同巢之祥優詔褒之改戶部使歲入羨錢三十萬拜參知政事與北院樞密使耶律乙辛忤乙辛排詆出之終崇義軍節度使致仕適燕薊民饑伸與致仕趙徽韓造日濟以糜粥所活不勝筭其卒也洪基悼甚贈賻加等

耶律儼字若思析津人世姓李父仲禧咸雍中爲樞密使賜國姓封韓國公嘗黨耶律乙辛陷儲君濬云儼第進士歷景州刺史有善政郡人刻石頌之改御史中丞平反滯獄歷山西路都轉運使刮剔垢弊壽隆初自樞

密直學士拜參知政事洪基晚年倦勤用人不能自擇
令各擲骰子以采勝者官之儼得勝采洪基曰上相之
徵也累知樞密院事賜經邦佐運功臣封越國公脩契
丹累朝實錄七十卷受顧命立天祚累封郡王卒贈尚
父諡忠懿儼博學廉介一芥不取於人獨惜以非道固
寵妻邢豔出入禁中戒勿失上意世以此哂之

蕭巖壽乙室部人爲人廉直常面折廷諍無所忌太康
初爲北面林牙密奏北院樞密使耶律乙辛忌皇太子
預政日與張孝傑相過從恐有陰謀動搖太子時乙辛
已誣后罪賜死洪基頗悟出乙辛爲上京留守會乙辛

生日洪基遣人賜物爲壽乙辛因私屬爲白曰臣見姦人在朝陛下孤危身雖在外竊用寒心洪基遂疑巖壽出之而召乙辛仍流巖壽于烏隗路終身拘作未幾誣巖壽與謀廢立事執還殺之天祚立贈同中書門下平章事繪像殿中

耶律撒剌字董隱南院大王阿魯古之孫性忠直沉厚歷契丹行宮都部署太康二年洪基詔百官廷議欲召還耶律乙辛撒剌三進諫不納乙辛旣入讓撒剌曰與君無憾何獨異議對曰此社稷計何憾之有乙辛竟誣與蕭速撒等同謀廢立殺之語在洪基傳天祚立追封

漆水郡王繪像殿中

蕭速撒字禿魯性沈毅歷北院樞密使嘗立軍功及經略邊事稱旨太康二年耶律乙辛權寵方盛附麗者多至通顯速撒未嘗造門乙辛銜之誣以首謀廢立殺之語在洪基傳速撒尸諸原野盛夏至不變烏鵲不敢近天祚立追封蘭陵郡王繪像殿中

耶律撻不也字撒班林牙高家之子累功遷至北院宣徽使耶律乙辛謀害太子撻不也知其姦欲殺乙辛及其黨蕭特里得蕭十三等乙辛覺誣以廢立事蕭撻不也字幹里郡王高九之孫歷駙馬都尉漢人行宮都部

署與耶律撻不也善乙辛嫉之乃升訟以廢立同見殺天
祚立竝追封郡王繪像殿中又有蕭忽古者字阿斯性
忠直矯捷有力爲護衛官屢欲殺乙辛等乙辛知而械
繫之考効不服流于邊及速撒欲成瀆廢召忽古殺之
天祚立贈龍虎衛上將軍又有耶律孟簡者字復易于
越屋質五世孫節度劉家奴之子優詞學當乙辛出爲
留守也孟簡與耶律庶箴表賀未幾乙辛召還舊職流
孟簡保州孟簡雖放逐以道自安太康中始得歸鄉里
擢至昭德軍節度卒

蕭兀納一名撻不也字特免太康初爲北院宣徽使時

耶律乙辛已害諸君濬又欲害其子燕王延禧而以宗
室子淳爲請元納諫不可以國與人洪基猶豫不決五
年洪基出獵乙辛請留延禧母行元納奏曰聞將留皇
孫臣請侍左右恐有他變洪基始疑乙辛卽俛淳等出
之以元納同知樞密使封蘭陵郡王授殿前都點檢謂
侍臣曰元納忠純屋質立穆宗無以過也卿等宜達燕
王知自是令元納輔導益見優寵大安初詔尚主固辭
壽隆初拜北府宰相元納數以直言忤燕王及嗣位出
元納爲節度使守太傅坐譴奪官旣又歷東北路統軍
使前後數上書言女真有輕朝廷心宜早爲備又言女

真其志非小宜及其未發舉兵圖之不聽他日同知南
院樞密使事蕭陶蘇幹亦慮女直難制如兀納言亦不
聽蓋北院樞密使蕭得里底排其議也兀納嘗因敗軍
免隨以拒叛臣耶律章奴功授副元帥終契丹都宮使
兀納近古社稷臣言皆剴切惜天祚不能用云陶蘇幹
後以太子太傅致仕

大公鼎渤海人咸雍十年第進士調瀋州觀察判官遼
東大雨水北樞密院大發瀕河丁壯以完隄防公鼎曰
邊障甫寧大興役事非利國便農之道奏罷役水亦不
爲災改良鄉令勸農興學部民服化徙長州錢帛都提

點拒公主假貸曰豈可徇人情廢官守耶俄拜大理卿
多平反天祚立歷東京戶部使盜殺留守蕭保先因而
倡亂民亦互生猜忌家自爲鬪公鼎單騎行郡陳以禍
福衆皆投兵而拜曰是不欺我敢弗聽命安輯如故拜
中京留守賜貞亮功臣時盜賊充斥有遇公鼎于路者
卽叩馬乞自新公鼎給以符約俾還業聞者接踵而至
不旬日境內清肅加賜保節功臣公鼎以人心反側慮
生變請有恩惠以安之爲之肆赦累表乞歸不許會奴
賊張撒八率無賴嘯聚公鼎欲擊而勢有不能嘆曰吾
欲謝事久矣爲世故所牽不幸至此豈命也夫憂積成

疾卒遼世能吏有蕭又馬人望王棠楊遵山耶律鐸隆
公鼎爲稱首

蕭札刺字虛輦北府宰相排押之弟性介特不事生業
歷寧遠軍節度使秩滿里居淡泊自適隆緒累召權輒
以疾辭遂入頡山築室杜門不談時務人目曰頡山老
人云其後有耶律官奴者字奚隱林牙幹魯之孫沈厚
多學重熙中爲宿直將軍以疾免旣而宗真兩命爲節
度使輒請致政官奴與蕭哇友善謂之二逸哇謂官奴
曰仕不能致主澤民成大功烈何屑屑爲也吾與若居
林下以枕簟自隨觴詠爲樂雖不官無嫌焉又有蕭蒲

萬不者字援懶魏王惠四世孫少失怙恃能力學於文藝無不精天祚召欲官之皆以疾辭或勸之出以嗣先世功名曰吾年踰強仕安能益主庇民乎晚年謝絕人事卜居抹古山超然自得論者謂遼委權優寵之臣不出宗室與后族其間不淫於富貴不詘於聲利若札刺等三人者不亦卓乎

耶律中爲五院都監天祚末金兵徇地嶺西盡徙其民中死之韓慶民爲宜州節度使金兵破宜州慶民死之遼亡死事之臣他無所於考烈婦可考者四人中與慶民之妻與焉方中被召爲都監謂妻援蘭肅氏曰我當

以死報國汝能從乎對曰謹奉教及中死援蘭躍馬至
中死所自殺慶民妻不知其姓氏慶民死金人以妻配
將士妻誓死不從遂自殺又其一則蕭意辛乃陶蘇幹
尚主所生女耶律奴之妻也奴與樞密使乙辛有隙被
誣流烏古部洪基念意辛主女欲使絕婚意辛辭曰夫
婦之義生死以之臨難乖離於禽獸何異乞與奴偕行
卽死無恨從之意辛同奴在貶所久禮敬有加于舊洪
基嘉其節召舉家還子國隱事天祚保大中意辛在臨
漢謂諸子曰吾度盧彥倫必叛汝輩速避我當死之賊
至遇害又其一則蕭訛里乃國舅孛董之女耶律朮者

之妻也木者登朝早喪訛里極哀毀旣葬謂所親曰夫婦之道如陰陽表裏無陽則陰不能立無表則裏無所附妾亦何聊賴耶侍婢慰勉竟無回意自刃而卒

遼之境土內有五京六府上京道曰臨潢府卽古遼東郡東京道曰遼陽府卽古朝鮮國中京道曰大定府興中府卽古遼西郡斯皆自唐以來契丹所有也南京道曰析津府卽古燕國西京道曰大同府卽古雲中郡斯皆德光援立石晉所得也州軍城百五十有六縣二百有九東至海西至金山暨流沙北至臚胸河南至白溝方萬餘里內之部族拔里乙室已國舅石烈等凡五

有四外之屬國女真突厥吐蕃奚室韋吐谷渾党項等
凡五十有九部族分鎮邊圉寔爲爪牙屬國朝貢無常
或有期會及下令專征不從者討之助軍多寡隨其便
無常額境內之民以畋牧爲稼穡故以兵馬爲徭賦勝
甲冑者盡籍爲兵每兵一馬三器仗皆自備馬逐水草
人仰湏酪挽強射生以給日用官無芻糧之費一有徵
發卯命辰集居有宮衛謂之幹魯朶出有行營謂之捺
鉢自禁軍而下爲名三十餘九重者皮室屬珊二軍各
隸以精兵數十萬凡二帳十二宮一府并五京有兵一
百六十四萬部族屬國之兵不與焉分地牧馬屯田積

粟坑冶鑄錢又有關市之征鹽鐵之利雖頻歲軍興四
時遊獵而調度不乏號稱富強其設官之制改夷禹董
爲大王分爲北南院宰相樞密以至郎君護衛皆分北
南然皆謂之北面也北南宰相兼總庶務北樞密視兵
部南樞密視吏部北南二大王視戶部夷離畢視刑部
宣徽視工部敵列麻都視禮部曰惕隱者典族屬也曰
林牙者典文翰也曰詳穩者將領之別名也曰于越者
坐而論議象公師不輕授也是謂國制後得燕代十六
州復設南面三師三公三省六部臺院寺監東宮王傅
及諸衛點檢指揮諸州節度觀察防禦刺史縣令分布

五京是謂漢制宮帳部族屬國之政北面主之漢人州縣和賦軍馬之政南面主之雖參用漢人然共國任事則惟宗室耶律外戚蕭氏二族而已武事旣振文治漸興祀功德則建孔子廟崇學術則開進士科設黃麾六軍之仗制吉凶軍賓嘉之禮及雅樂大樂散樂饒歌鼓吹樂皆唐晉之舊曆法初用宋曆本何承天後用大明曆本祖沖之然與宋曆間朔間有異焉乃若遼主與南面漢官用漢服女后與北面契丹臣僚用國服女后習射御便鞍馬畋獵軍旅未嘗不從有事神祇亦同展祀禱雨射柳或先祭而後射或先射而後祭謂之琴瑟

儀出師以囚還師以俘縛置所向之方亂矢射之以祓
不祥謂之射鬼箭遼主每歷十二歲擇季冬日於禁中
除地設再生室母后室及先主神輿倒植三岐木其日
羣臣迎國主入室釋服跣足以童子從三過岐木之下
室中人呼曰生男遂拜先主宴羣臣謂之再生儀與所
謂祭山儀柴用儀春夏避暑秋冬違寒暨歲序雜儀又
本國樂諸國樂斯皆循襲其故俗耳至於刑辟雖參漢
制然炮烙車轆投厓砲擲梟磔生瘞支解剖心迄遼世
莫之能革蓋武猛殘忍之性然也遼之政俗此可見其
樂云

論曰阿保機滅諸酋而得國見於歐陽五代史及朱子綱目其說皆同遼史乃謂受禪於痕德堇可汗臣爲君諱胡可信也阿保機威行大漠志窺中國德光繼之遂奄有燕雲虜晉帝子孫襲其富強數寇掠邊鄙自非有宋之隆寧能沮雄心而保信誓早第忍恥結成歲輸五十萬計國體旣損大農之費亦不可支斯徽宗所以乘天祚之隙協謀于金以甘心也雖然遼未亡則金不能爲宋患以烏喙療飢可言智哉

宋史新編卷一百九十三

宋史新編卷一百九十四

列傳一百三十六

明南京戶部主事莆田柯維騏著

外國

金國一

金之先號靺鞨亦號勿吉元魏時勿吉有七部隋並號靺鞨唐初惟有黑水粟末二部粟末始附高麗姓大氏後爲渤海稱王傳十餘世黑水居肅慎地東瀕海南接高麗亦附于高麗開元中來朝爲置都督府賜姓李名獻誠其後屬渤海朝貢遂輟五代時遼盡取渤海地而黑水屬于遼在南者籍遼號熟女真在北者不在遼籍

號生女真生女真地有按出虎河有混同江有長白山
江又名黑龍謂之白山黑水本名女真避遼主宗真諱
曰女直宋初屢貢名馬及海東青太宗時請兵伐遼不
從遂不通使而歲貢于遼不絕其始祖曰函普者自高
麗來居完顏部時年六十餘能爲部內息爭配以六十
未嫁之女仍爲同部遂爲完顏部人生二子長曰烏魯
烏魯生跋海跋海生綏可綏可徙居海古水耕墾樹藝
始築室有定居綏可子石魯稍創條教以威諸部而石
魯子烏古遂役屬之遼主乃以烏古爲生女真部族節
度使烏古不肯繫遼籍辭其印不受旣爲節度使置官

屬紀綱漸立國中舊無鐵烏古傾貲償鄰國之鬻甲冑者因之脩武備附者踵至時桓赧散達父雅達爲國相烏古用幣馬求於雅達以子頗刺淑爲之國俗諸子長各異居烏古知次子劾里鉢能成大事而四子頗刺淑五子盈歌俱有勇略謂長子劾者三子劾孫柔和可治家務乃以劾者與劾里鉢同居劾孫與頗刺淑同居劾者劾孫不復與外事故烏古卒劾里鉢襲節度使頗刺淑竭心匡輔值叔父跋黑有異志及桓赧散達諸部相繼作難悉大破之隨降其衆劾里鉢娶孛懶氏生數子長烏雅束次阿骨打劾里鉢襲位十九年陰有取遼之

志寢疾以阿骨打屬弟盈歌曰烏雅束善柔惟此子足
了契丹事旣卒頗刺淑繼之頗刺淑卒盈歌繼之紇石
烈部阿疎叛盈歌攻其城取之事詳遼國傳天祚政衰
蕭海里叛盈歌屢執私交之使以獻遼兵與海里遇不
能克烏雅束阿骨打突戰射殺之盈歌卒烏雅束繼之
烏雅束卒於是阿骨打興

阿骨打又名旻多力善射知勇絕人在其父時遼主錄
功與其兄皆爲詳穩其克蕭海里也兵不滿千奮曰有
此甲兵何事不可圖烏雅束末年命諸部不得擅置信
牌以一號令皆其謀也及繼烏雅束稱都勃極烈自以

侍宴混同江爲遼主所猜又知遼主淫酗不恤國政乃稱兵併旁近部族逾年督諸路兵得二千五百人數遼侵侮及納叛臣阿疎罪伐之遼兵雖數十萬數爲所挫出河店之戰殺獲尤衆遼人嘗言女真兵若滿萬則不可敵至是始滿萬云羣臣勸進遂卽皇帝位阿骨打曰遼以賓鐵爲號取其堅也然賓鐵終變壞惟金不變不壞且完顏部色尚白故國號大金紀年曰收國元年正月遼主遣將以三十萬兵戍邊且屯田爲長久計金主率衆趨達魯古城大敗之三月遼主遣耶律張奴等六人使金諭降金主以書辭慢留五人獨遣張奴還報書

亦如之六月遼主復遣張奴使金國書稱斥金主名報書亦如之且諭遼降已而遼主復遣蕭辭刺使金金主以書辭慢執之九月金主征黃龍府次混同江無舟金主使一人道前乘赭白馬徑涉曰視吾鞭所指諸軍隨之水及馬腹舟人測其渡處深不得其底既克黃龍遠至江徑渡如前冬遼主將兵七萬伐金金主率諸將禦之適遼聞內難而返襲敗于護步答岡時金兵僅二萬云二年金主遣幹魯取遼東京州縣及南路繫遼女真皆降明年曰天輔元年金主遣幹魯古取遼顯州其乾懿豪徵成川惠七州皆降徽宗知金將滅遼遣卷川

防禦使馬政浮海往使金議夾攻及復石晉時陷入漢地二年金主遣散覲報聘于宋謂所請地當與大朝夾攻得者有之若本朝自取不在分割之議是後金主與遼議和約遼上封冊以兄事之遼凡七遣使至金議冊禮及冊至以匪式責之而金主自定冊文遼主亦不可再遣使議語在遼國傳金主怒謂其臣曰遼人屢敗遣使求成惟飾虛辭以爲緩師之計當議進討乃四年五月金主自將攻遼上京克之其留守耶律撻不野以城降五年遼都統耶律余覲降于金金主以余覲言議伐遼命斜也爲內外諸軍都統以粘罕幹木幹离不等副

之仍許便宜行事六年斜也等取中京復取西京遼主連遁獲阿疎以歸金主杖而釋之其冬金主率諸將兵陷燕京遼大臣左企弓等上表降七年金主命平州官與宋使分割燕京六州之地是時左企弓獻詩于金主曰君王莫聽捐燕議一寸山河一寸金故金主徵背宋約要求歲幣二十餘萬匹以代燕地之稅使者往返竟如其意燕之金帛子女職官富民皆爲金所掠而東宋所得惟空城而已是月金主改平州爲南京以張覺爲留守無何張覺叛金殺左企弓以州歸宋六月金主在軍中有疾八月卒年五十六改元者二凡九年阿骨打

有大度既下遼諸州陵墓在乾禁無所犯凡克城邑往往釋其俘亡去者亦戒諸將勿殺其後執高永昌妻子以城降者乃寧江州所釋東京渤海人也所至除遼苛政人心咸悅云有子十三人以弟吳乞買嗣立諡曰武元皇帝廟號太祖

吳乞買又名晟阿骨打母弟也阿骨打卽帝位以吳乞買爲誥班勃極烈委以國事及阿骨打卒其子宗幹宗峻率羣臣立吳乞買改天輔七年爲天會元年夏與高麗聞金主立先後奉表稱藩十一月幹离不與張覺戰南京覺敗奔宋金人索覺急將攻燕徽宗乃斬覺函首

界之事在覺傳三年八月婁室獲遼主天祚于余覲谷
至金降封海濱王遼自是亡但有西遼云十月金主詔
斜也等分道侵宋宋師屢敗郭藥師降金燕山州縣悉
復爲金有四年正月金將幹离不取滑州遣吳孝民入
汴問宋納張覺事令執送童貫譚稹彦度以黃河爲界
納質奉貢俄而諸軍圍宋都城欽宗遣李昉謝罪且請
脩好納質割三鎮地增歲幣誓書稱姪大宋皇帝伯大
金皇帝金師解圍未幾金主叛盟復遣粘罕幹离不侵
宋乘勝陷都城明年執徽宗欽宗以歸號爲庶人立宋
少宰張邦昌爲大楚皇帝事詳欽宗本紀高宗嗣位

使如金奉表請和金主不從命進兵伐宋徽宗欽宗旣至金金主封徽宗爲昏德公欽宗爲重昏侯已而徙居韓州數年復徙于鶻里改路亦名五國城是年金主立宋叛臣劉豫爲大齊皇帝脩子禮十三年卒年六十一改元者一吳乞買乘滅遼之威大舉入宋而背盟黷武荼毒中華俘人之君帝人之臣虐戾亦太甚矣特有子十四人舍之而立其兄之後人以爲難合刺立諡曰文烈皇帝廟號太宗

合刺又名亶阿骨打嫡子宗峻子也母蒲察氏吳乞買末年屬意合刺以爲諸班勃極烈蓋吳乞買嘗居是官

及襲帝位遂以命弟斜也斜也卒吳乞買定議爲儲嗣故命合刺合刺繼吳乞買而立仍以天會紀年追尊考妣爲帝后考廟號徽宗又尊函普以下至烏雅束俱爲帝后廟號函普曰始祖綏可曰獻祖石魯曰昭祖烏古曰景祖劼里鉢曰世祖頗刺淑曰肅宗盈歌曰穆宗烏雅束曰康宗定烏古劼里鉢阿骨打吳乞買之廟皆不祧班曆曰大明廢劉豫爲蜀王立行臺尚書省于汴凡三年始收天眷元年乃紹興八年也先時宋遣王倫使金請還梓宮及河南地元帥撻懶言於金主請以廢齊舊地與宋而東京留守訛魯觀亦云我以地與宋宋必

德我羣臣皆云勿與便二人者附太師蒲盧虎蒲盧虎
遂定議歸河南陝西地及是和議成金乃遣張通古偕
王倫來言歸地以詔諭江南爲名明年王倫至汴見
趙未交割地界兀朮渡河而去移行臺于大名府兀朮言
於金主曰撻懶蒲盧虎主河南地與宋必有陰謀今宋
使在汴勿令踰境倫因如金致使指遂拘之于河間而
蒲盧虎撻懶相繼以謀反伏誅三年五月金主叛盟復
命兀朮取河南撒離合取陝西所至州縣多迎降者九
月殺左丞相完顏希尹父子及右丞相蕭慶明年改皇
統元年金主初御袞冕二月改封徽宗爲天水郡王欽

宗爲天水郡公封天祚爲豫王九月兀朮復帥兵渡淮以書讓宋宋復書乞罷兵兀朮以便宜畫淮爲界語在本紀二年金主以和議成遣使以袞冕圭冊冊宋高宗爲大宋皇帝歸徽宗及三后梓宮隨遣宋使者朱弁張邵洪皓來歸四年金主以宋使者王倫爲平州轉運使不從遂遇害七年四月以便殿宴醉殺戶部尚書宗禮六月又殺節度使田穀等八人九年四月壬申夜大風雨雷震壞寢殿鴟尾有火入寢燒幃幔金主趨避別殿丁丑有龍鬬於榆林河水上大風壞官民舍瓦木人畜皆飄揚十數里五月以天變肆赦命翰林學士張鈞草

詔參知政事蕭肄摘其語譯奏以爲訕金主大怒命衛士榜鈞數百不死以手劍釐其口而醢之十月又殺其二弟胙王常勝節度使查刺及左衛將軍特思十一月殺后裴滿氏納常勝妻撒卯於宮中將立爲后數日殺故鄧王子阿懶特懶又數日殺妃烏古論氏及夾谷氏張氏十二月又殺妃裴滿氏於寢殿右丞相亮因羣臣震恐陰謀宿衛夜半入宮爲亂遇弒卒年三十一改元者二凡十五年合刺初年粘罕幹离不等相繼秉機務吏清政簡百姓樂業及舊臣凋謝后裴滿氏干預政事數年後繼嗣不立頗爲掣制內積不平無聊縱酒遂爲

暴虐之主禍起蕭牆宜也亮立降爲東昏王其後烏祿
立諡曰武靈皇帝廟號閔宗改號熙宗

亮字元功本名迪古乃阿骨打庶子宗幹子也嫡母徒
單氏母大氏合刺以嫡孫嗣位亮以已亦孫行且其父
庶長子也頗懷覬覦其爲中京留守結納猛安蕭裕裕
揣知其意因勸舉大事且曰願竭力以從皇統九年正
月亮由右丞相兼都元帥金主使小底大興國賜亮生
日禮物后亦附賜禮物金主不悅杖興國百追還所賜
亮不自安逆謀從茲萌矣三月拜太保領三省事五月
學士張鈞草罪已詔忤旨金主問誰使爲之左丞相宗

賢對曰太保實然遂出亮領行臺尚書省事過中京與
蕭裕定約而去至良鄉召還亮莫測所以大恐旣至復
拜平章政事由是益危迫金主嘗以事杖左丞唐括辯
及右丞相秉德辯乃與大理卿烏帶謀廢立而烏帶先
以此謀告亮他日亮與辯語及廢立事曰若舉大事誰
可立者辯曰胙王常勝乎問其次曰鄧王子阿懶亮曰
阿懶屬疎安得立辯曰公豈有意耶亮曰果不得已捨
我其誰於是旦夕相與密謀護衛將軍特思疑之發其
事金主怒復杖辯金主之弟止有常勝查刺亮乘此構
常勝阿懶兄弟金主命特思鞫之無狀亮曰特思鞫不

以實遂俱殺之護衛十人長僕散忽土舊受宗幹恩徒單阿里出虎與亮姻家大興國給事寢殿嘗以李老僧屬亮得爲尚書省令史故使老僧結興國爲內應而興國亦以被杖怨金主遂與亮約十二月丁巳忽土阿里出虎內直是夜與國取符鑰啓門守者以辨駙馬不疑內之亮與秉德辨烏帶徒單貞李老僧等俱得入及殿門衛士覺抽刀劫之莫敢動至榻前金主求榻上常所置佩刀不知已爲興國易置其處阿里出虎先進刀忽土繼之金主已頓仆亮復前手刃之血濺滿其面與衣秉德等未有所屬忽土贊其決乃奉亮坐皆拜稱萬歲

矯金主命召大臣因殺曹國王宗敏左丞相宗賢是月
秉德辨烏帶忽土阿里出虎貞興國竝進秩改是年爲
天德元年追尊考爲帝廟號德宗二年正月尊嫡母及
母皆爲太后亮銜秉德首謀廢立不卽勸進又忌吳乞
買諸子盛強將并誅之乃是年四月命尚書省令史蕭
玉上變逮大臣唐括辯秉德宗本宗美宗懿卞等并親
屬殺之又殺吳乞買子孫七十餘人粘罕子孫三十餘
人諸宗室五十餘人十月亮殺太妃蕭氏及其子任王
猥喝使使殺宗室行臺左丞相撒商喝于汴并殺平章
政事宗義前工部尚書謀里野御史大夫宗安皆夷其

族以魏王幹帶之孫活里甲好脩飾亦族之三年廣燕
京城大營宮室以尚書右丞張浩燕京留守劉筈等監
護盛夏興役人多疾疫是年亮納所誅宗室諸婦于宮
中叔母與焉四年七月復命崇義軍節度使烏帶之妻
唐括定哥殺其夫而納之明年三月遷都燕京初備法
駕改是年爲貞元元年改燕京爲中都府曰大興汴京
爲南京中京爲北京廢上京爲會寧府五月亮殺其弟
西京留守蒲家九蒲家所善官屬皆殺之十二月亮召
濟南尹葛王烏祿妻烏林答氏其妻曰我不行禍必及
王我當自勉不以相累也行至中途自殺二年正月右

丞相蕭裕積疑謀反既款伏亮召詰其故自刺臂血塗
裕面曰汝死後乃知朕無疑汝之心哭送出門殺之并
誅其黨前真定尹蕭馮家奴等三月太原尹徒單阿里
出虎坐陰謀伏誅并殺其妻命其子駙馬都尉木斯刺
焚其骨投水中十一月亮命諸從姊妹皆分屬諸妃與
爲淫亂臥內徧設地衣裸逐爲戲三年六月汴京火焚
宮室時亮有南侵之意倖臣李通張仲軻等從而導之
亮乃謀遷汴遣完顏長寧爲留守經畫其事及災杖殺
長寧明年改爲正隆元年十月改葬其始祖以下十主
于燕之大房山二年十月命會寧府毀舊宮殿諸大族

第宅及儲慶寺仍夷其址而耕種之三年正月召張仲軻等於便殿侍坐談及國家輻員仲軻曰今天下有四主必一統乃可言大且宋有罪伐之不爲無名亮喜曰向者梁琬嘗言宋有劉貴妃姿質艷美今當一舉而兩得之十一月命左丞相張浩參知政事敬嗣暉管汴京宮室四年二月脩中都城造戰船于通州下詔伐宋調諸路兵六年二月亮決意遷都發燕京尚書省以下諸司皆從行三月丁亥將至獲嘉有男子上書言事斬之所言莫得聞五月亮遣使于宋求淮漢地且詰宋焚汴京宮室及沿邊買馬招致叛亡以爲兵端六月癸亥亮

脩法駕入汴京八月癸丑亮以嫡母徒單氏諫伐宋縊
于寧德宮仍命卽宮中焚之棄其骨水中并殺侍婢十
餘人九月庚寅亮自將三十二總管兵伐宋以奔睹爲
左領軍大都督李通副之紇石烈良弼爲右領軍大都
督烏延蒲盧渾副之又設左右監軍及左右都監俱自
壽春入分命諸將一趨臨安一趨蔡州一趨鳳翔取散
關甲午亮戎服乘馬啓行十月至蒙城是時將士自軍
中逃歸者相屬于道皆公言於路曰我輩今往東京立
新天子矣十月丙午曹國王烏祿卽位于遼陽改元大
定亮以丁未渡淮至廬州獲白鹿以爲武王白魚之兆

諸將連取宋州郡間失利十一月庚午亮駐和州始聞
烏祿事拊髀嘆曰我本欲滅宋後改元大定豈非天命
乎更以完顏元宜爲浙西道兵馬都統制郭安國副之
亮駐軍江北遣總管阿隣先渡江與宋兵戰失利亮還
和州遂進兵揚州甲午會舟師于瓜州渡期以明日渡
江安國輕躁無方略奮勇爲前鋒李通爲謀主督責苛
急諸將皆怨疾乙未完顏元宜等軍反弑亮于揚州龜
山寺并通安國及其黨徒軍永年皆殺之蓋諸將以南
軍有備不欲渡江亮性復諫者輒死亡者衆刃剗之衆
不能堪故有此變初亮伐宋留太子光英于汴居守以

太子太師兼統軍使隋滿訛里也護衛之左丞相張浩
參知政事敬嗣暉留治尚書省事及亮被弑都督府移
文訛里也殺太子退師與宋和而浩等亦遣人同奔睹
等上表賀烏祿云亮死年四十吹元者三凡十三年亮
剛愎淫虐滅絕綱常而意廣禍速父子爲戮擬之古無
道主豈在隋煬下哉烏祿立之二年降封海陵郡王諡
曰煬後有司復奏亮惡再降庶人不得耐諸王域兆
烏祿又名雍阿骨打之孫宗輔子也母李氏烏祿偉姿
貌美鬚髯長過其腹胸間有七子如北斗形性仁孝沈
靜明達善騎射國人稱爲第一皇統間以宗室子封葛

王爲兵部尚書後歷東西京留守改封曹正隆六年八月起復東京留守副留守高存福女在海陵後宮海陵便存福伺烏祿起居適烏祿以造兵器餘材造甲數千存福因宣言留守何爲造甲密報海陵遂與推官李彥隆託爲擊毬謀不利於烏祿烏祿嘗憂海陵令謀良虎圖淮北諸王偶值故吏六斤乘傳自南來具言海陵殺母及宗室大臣事且曰今復遣人來害宗室兄弟矣烏祿益懼及聞存福圖已事且有迹託以議事召官屬會清安寺彥隆先到存福累召始來並於座上執之十月南征諸將完顏福壽高忠建虜萬家奴等自山東率所

領兵數萬至完顏謀衍自長安領兵五千至俱入城擊殺存福等翌日諸軍勸進烏祿乃卽帝位改是年爲大定元年下詔暴揚海陵罪惡數十事尊考妣爲帝后考廟號德宗遂如中都未幾海陵遇弑于揚州十二月烏祿至中都受羣臣朝遣高忠建等以罷兵歸正隆所侵地報于宋是月故遼人窩幹稱帝改元天正二年正月兵部尚書可喜延安府同知李惟忠謀反伏誅詔中惟忠卽老僧海陵易是名是月遣右副元帥完顏謀衍率師討窩幹二月補闕馬欽以諂事海陵除名降蕭王敬嗣暉許霖等官放歸田里九月元帥右都監完顏

思敬擒窩斡餘衆悉平十月金主以宋使書辭非皇統舊式命副元帥紇石烈志寧侵宋十一月復命右丞相僕散忠義節制南侵諸軍金主諭之曰宋若歸侵疆貢禮如故則可罷兵三年正月取德順州四月取商虢環州宋吳玠所復三路一十六州軍皆爲金有五月宋攻宿州金將志寧復取之宋將李顯忠邵宏淵議不叶師大潰于符離是年金將志寧致書于宋求海泗唐鄧四州地及歲幣孝宗亦屢遣使報之最後孝宗命胡昉爲審議官以宰相湯思退書與金將忠義其書稱姪國不肯加世字忠義拘昉軍中四年金主聞昉被拘曰行人

何罪當卽遣還八月金主促諸將伐宋十一月金將徒單克寧敗宋兵取楚州數日金主復促進兵先是宋遣魏札使金軍金將以不如約却之至是復遣周葵王之望致書約世爲姪國書不稱大字稱姪宋皇帝稱名再拜奉書于叔大金皇帝歲幣二十萬和議始成五年正月孝宗遣魏杞以國書使金金主以歲幣悉賞諸軍七年十二月東京留守徒單合喜北京留守完顏謀衍肇州防禦使蒲察通朝辭金主賜之金帶諭之曰卿雖有才能用心多詐朕左右須忠實人故以補外此賜答服勞之久也又顧謂宣徽使敬暉曰如卿不可謂無才所

欠者純實耳十年閏五月孝宗遣范成大使金請陵寢
及更定起立受書之禮金主不從復書略云和好再成
界山河而如舊緘音遽至指鞏洛以爲言旣云廢禮欲
伸追遠之懷止可奉遷卽俟刻期之報至若未歸之旅
櫬亦當竝發于行塗抑聞附請之辭欲變受書之禮於
尊卑之分何如顧信誓之誠安在十一年正月汾陽軍
節度副使牛信昌生日受饋獻當奪官金主謂宰相曰
朝廷行事苟不自正何以正天下自今宰執樞密饋獻
亦宜罷去三月用一品禮附葬欽宗於鞏洛之原十一
月金主幸其太子宫謂太子曰吾兒在儲貳之位朕爲

汝措天下當無復有經營之事汝惟無忘祖宗純厚之風以勤脩道德爲孝明信賞罰爲治而已是年及十二年宋復遣使請更受書禮俱不從十三年三月金主謂宰臣曰自海陵遷都永安女真人浸忘舊風朕時嘗見女真風俗迄今不忘今之燕飲音樂皆習漢風蓋以備禮也非朕心所好甚欲一至會寧使子孫得見舊俗庶幾習效之十四年金主圖畫開國功臣二十人于衍慶宮十五年九月高麗西京留守趙位寵以慈悲嶺至鴨渚江四十餘城附于金金主曰朕豈助叛臣爲虐執其使付高麗位寵伏誅二十二年東京留守徒單貞以與

海陵逆謀伏誅妻子竝賜死海陵易大興國名曰邦基
及是詔暴邦基逆謀磔于先王墓側海陵逆黨九人至
是俱盡獨完顏元宜首弑海陵得正死人以爲恨二十
四年三月金主將如上京命太子守國諭之曰以汝守
國譬之農家種田商人營財但能不墜父業卽爲克家
子二十五年四月金主在上京欲還都謂宗室戚屬曰
太平歲久國無征徭汝等皆奢縱往往貧乏朕甚憐之
當務儉約無忘祖先艱難二十八年宋高宗崩孝宗遣
使獻遺留物金主頗怪禮物薄丞相徒單克寧諫曰此
非常貢責之近於好利金主然之乃以玉器五玻璃器

二十及茶器弓劍之屬使還遺宋曰珍玩之物所宜寶藏以無忘追慕今受之義有不忍也二十九年卒年六十七改元者一烏祿孛孛爲治夜以繼日尚食庖人約量損減近臣獻琵琶却之且飭自今勿以聲技獻嘗謂宰相曰朕觀在位之臣初入仕時競求聲譽以取爵位今旣顯達卽循默苟容爲自安計朕甚不取又曰今在位不聞薦賢何也狄仁傑雖賢非婁師德何以自薦乎又曰人之幹能固不易得然不若德行之士最優也又曰朕於女真人未嘗不加優恤然涉於贓罪雖朕子弟亦不能恕也又曰人多奉釋老意欲徼福夫上天立君

使之治民果能愛養下民上當天心福必報之又曰亡
遼日屠羊三百豈能盡用徒傷生耳彼身爲惡而口所
福何益之有是時南北講和封徼晏然上下相安家給
人足而犯法者寡刑部歲斷死囚不過二十人號稱小
堯舜至於夫人烏林答氏守節而死終身不立后尤常
情所難也孫璟立謚曰光天興運文德武功聖明仁孝
皇帝廟號世宗

璟小字麻達太子允恭之嫡子母徒單氏璟初封金源
郡王進原王大定二十六年四月拜尚書右丞相允恭
既早卒乃立璟爲皇太孫二十八年受攝政之寶二十

九年正月卽位追尊考爲帝尊母爲太后者考廟號顯宗
改明年爲明昌元年八月金主諭宰臣何以使民棄末
務本以廣儲蓄令百官議戶部尚書鄧嚴請禁奢侈右
丞移刺履等亦曰凡人之情見美則願若不節以制度
則奢侈無極民之貧乏殆由此致方今承平之際正宜
講究此事爲經久法金主從之二年六月禁稱本朝人
本朝言語爲審六年正月給靖康帝戚屬田宅明年
改爲承安元年四年十二月進封淑妃李氏爲元妃先
時有持國應經童科入仕得侍金主於東宮及卽位遂
用爲參知政事持國知金主好色干以祕術又多賂遺

左右而所幸李妃自嫌門地寒薄欲藉外廷爲重亦數稱譽持國由是金主信任之持國與妃表裏擅政時人語曰經童作相監婢爲妃惡其卑賤庸鄙也張復亨等十人趨持國門俱爲臺官謂之胥門十哲嘗爲言者所論十人者與持國並坐免踰月持國復得召承安凡五年改明年爲泰和元年二年八月鳳凰見于磁州武安縣鼓山石聖臺十一月更定德運爲土臘用辰十二月定人戶物六隨時推收法五年五月金主聞宋將用兵命平章政事僕散揆宣撫河南以備宋揆移文詰問用兵之故宋以鐫諭邊臣爲辭揆信之宋將郭倪等復行

問於揆揆白金主罷宣撫司六年四月金主聞宋出師
規取唐鄧復命僕散揆領行省于汴盡徵諸道籍兵分
守要害六月金主詔彰德府守臣護宋宰相韓侂冑祖
琦墳墓凡宋宗族所居有司提控之十月僕散揆督諸
道兵侵宋十一月宋督視江淮軍馬丘密兩遣使赴金
軍議和十二月宋四川宣撫副使吳曦叛送款于金將
完顏綱獻蜀四州求封蜀王丘密復遣使議和是年金
兵連陷西和等州遂破大散關事詳寧宗本紀七年二
月宋督視江淮軍馬張巖遣方信孺赴金軍議和是月
金主遣使冊吳曦爲蜀國王曦隨爲安丙所殺五月張

巖復遣方信孺議和增歲幣八月張巖復遣方信孺持
國書誓草議和許通謝百萬緡金帥完顏宗浩變前說
不許語在方信孺傳十一月韓侂胄遣王柟議和約稱
伯增歲幣犒軍錢誅蘇師旦函首以獻既而宋誅侂胄
宰相錢象祖移書于金金主遂決和議命元帥完顏匡
移牒求函侂胄首以贖淮南故地八年二月錢象祖遣
王柟議和復請川陝關隘四月錢象祖復遣王柟議和
函韓侂胄蘇師旦首赴金軍完顏匡露布以聞五月金
主命竿二首并懸畫象于通衢俾百姓縱觀漆而藏之
軍器庫金遂罷兵六月金主以大散關及濠州歸于宋

按金伐宋之役以僕散揆爲元帥揆卒以命宗浩宗浩卒以命完顏匡不三年而三易帥兵家所忌其成功者幸也九月遣吏部尚書賈守謙等十三人與各路按察司官推排民戶物力十一月金主卒年四十一改元者凡十九年璟際小康飾治具又數問羣臣漢室之核實唐代之考課可謂有志然宦豎李新喜用事妃戚李喜兒兄弟干政跋扈大臣如胡沙虎知之而不能去誅求無藝民力寢竭剪除宗室傳授非人金源之業從此衰矣永濟立諡曰憲天光運仁文義武神聖英孝皇帝

廟號章宗

永濟舊名允濟小字興勝烏祿第七子母李氏永濟歷
官至殿前都點檢更數鎮累封衛王璟初年雅愛諸王
置官屬以傳導之及趙王永中鄭王允蹈被誅由是疏
忌宗室以所置官屬檢制王家苛問嚴密門戶出入皆
有籍而允濟乃允蹈母弟柔弱鮮知能故璟愛之既無
繼嗣而諸叔兄弟多在璟皆不肯立惟欲立允濟泰和
八年十一月允濟自武定軍入朝是時璟已感嗽疾允
濟且辭行而璟意留之無何璟疾亟元妃李氏黃門李
新喜平章政事完顏匡定策比璟卒傳詔立允濟遂卽
位于樞前明年改爲大安元年璟有遺腹二人遺令生

男則立爲儲貳至是平章政事僕散端左丞孫卽康迎
合允濟意奏承御賈氏當以十一月免乳今則已出三
月范氏產期合在正月醫稱胎形已失范氏願削髮爲
尼於是允濟以范氏損其遺腹告中外有人告元妃李
氏令賈氏詐稱有身竝賜死乃完顏匡欲專擁立功而
構其罪也二年四月徐邳州河清五百餘里八月夏人
侵薺州是年蒙古主鐵木真出兵屢犯金境初金主爲
衛王時受命往靖州受鐵木真之貢寄其狀貌歸請以
事除之不許鐵木真頗聞其事及金主嗣位有詔至蒙
古傳言當拜受鐵木真問金使曰新君爲誰使曰衛王

也遽南面唾曰我謂中原皇帝是天上人佐此等庸懦亦爲之耶何以拜爲卽乘馬北去金主聞之怒欲俟鐵木真入貢就害之鐵木真知之遂與金絕益嚴兵爲備侵掠諸州其勢漸盛國人皇皇金主禁百姓不得傳說邊事三年四月蒙古兵復侵金境金主遣使乞和不許金乃戒嚴八月蒙古攻金西京留守紇石烈胡沙虎棄城遁蒙古主以精騎馳之金兵屢敗蒙古遂取西京及恒撫州九月尚書右丞千家奴參知政事胡沙並將兵屯邊千家奴遇蒙古兵棄烏月營而遁胡沙亦奔氣繼敗績于會河堡蒙古兵遂入居庸關大掠而去中都城

嚴是時楊安兒張汝楫兵起掠山東其德興弘州昌平懷來縉山豐潤密雲撫寧集寧東過平灤南至清滄由臨潢過遼河西南至忻代皆歸于蒙古明年改爲崇慶元年五月金諸路大饑劉二祖兵起掠山東明年五月改爲至寧元年時蒙古兵在近故遼人耶律留哥又以兵取遼東州郡金主起胡沙虎爲右副元帥領兵屯通玄門外胡沙虎者卽紇石烈執中也胡沙虎與經歷官文繡局直長完顏醜奴提控宿直將軍蒲察六斤武衛幹古論奪刺謀作亂乃八月辛卯胡沙虎矯稱知大興府徒單南平及其子刑部侍郎駙馬都尉沒烈謀

反奉詔討之南平姻家治中福海別將兵屯城北胡沙
虎以好語誘殺福海奪其兵壬辰自通玄門入使其黨
徒單金壽等先後召南平父子殺之福海子符寶郎鄒
暘都統完顏石古乃共召大漢軍五百人赴難與胡沙
虎戰於東華門外衆寡不敵皆死之胡沙虎扣東華門
遣人呼守直親軍百戶冬兒五十戶蒲察六斤俱不從
時有二蒲察六斤云都點檢徒單渭河縋而出見胡沙
虎令其聚薪焚東華立梯登城護衛斜烈拊鏢啓門納
胡沙虎遂入宮盡逐宿衛以其黨代之自稱監國都元
帥居大興府陳兵自衛癸巳逼金主出宮錮守于故

胡沙虎取宣命之寶陳於府階出制除拜醜奴等數十人官誘殺左丞完顏綱胡沙虎欲僭立猶豫未決訪在告丞相徒單鎰鎰曰昇王衆心所屬若決策立之萬世功也胡沙虎乃遣醜奴等迎珣於彰德遣宦者李思中弑金主於邸卒子從恪等六王皆廢錮立凡五年改元者三求濟不德故主以怨報之忍也舊臣賈鉉孫鐸不能任徒單鎰屢進讜言不能用完顏匡怙寵納賄不能遠孫卽康斗管之流躡而相之閹也政亂於內兵敗於外身弑國蹙覆亡之勢成矣珣立勅有司以禮改葬胡沙虎議廢爲庶人禮部尚書奧屯忠孝兵部侍郎蒲察

思忠附和之珣不從乃降封海東郡侯久之追復衛王
諡曰紹

珣又名吾耆補太子允恭之長子璟之庶兄也母招華
劉氏珣累封昇王判彰德等軍至寧元年九月珣念胡
沙虎擁立功而奧屯忠孝又力薦之遂以胡沙虎爲相
改是年爲貞祐元年十月金將木虎高琪與蒙古戰于
城北凡兩敗績初胡沙虎之督戰也高琪失期不至以
金主命免其死至是益兵令出戰戒之曰不勝斬汝及
兵敗高琪自度不免以兵殺胡沙虎于其第持其首詣
闕金主不能正高琪擅殺罪仍授左副元帥是冬夏

取涇州節度使夾谷守中死之蒙古徇觀州刺史高守約死之破蒲州判官齊鷹揚致仕屯留縣尉楊敏中州民張乞廬率兵巷戰死之時蒙古拔兩河山東凡九十餘郡人民殺戮幾盡金帛子女牛馬羊畜皆席卷而去二年蒙古逼燕城北金主遣使求和蒙古主以公主請乃以衛王少女及金帛童男女各五百馬三千與之蒙古主既成婚乃引還出居庸關五月金主以兵弱財匱不能守京師議遷都參知政事耿端義請遷南京右丞相南京留守僕散端凡三上表請金主遂決意遷汴太學生趙昉等四百人上書極論利害左丞相徒單鎰諫

曰變輿一動北路皆不守矣今已議和聚兵積粟固守京師策之上也南京四面受兵遼東根本之地依山負海其險足恃備禦一面以爲後圖策之次也翰林待制納坦謀嘉亦如鎰言俱不納於是偕六宮啓行留太子與都元帥完顏承暉左副元帥抹撚盡忠等守之先是金主欲遷虜軍於平州高琪難之及遷汴行至良鄉以抹撚盡忠言命護衛虜軍悉納還元給鎧馬虜軍遂作亂殺主帥推斫答等三人易之降于蒙古蒙古主聞金南遷怒曰旣和而遷是疑我也因受其降合兵以圍燕是年李全兵起于山東張鯨據錦州稱臨海王附蒙古

遼西州郡皆相繼降蒙古武州陷刺史完顏九住判官
唐括孛果速皆死之隨州陷節度使宋晟死之嵐州陷
節度使烏古論仲溫死之東明陷縣令王殺死之徇彰
德知府黃摺九住死之徇順州勸農使王晦死之密雲
陷留守木甲法心守將溫特罕咬查刺死之薊州陷節
度判官蒲察紇舍縣令溫特罕十方奴死之三年正月
夏人犯環州北京軍亂殺宣撫使奧屯襄中都右副元
帥蒲察七斤以其軍降蒙古三月金主以完顏承暉告
急遣元帥右監軍永錫左都監烏古論將兵御史中丞
李英護饗竝往援中都英馭衆素無紀律至霸州又被

酒爲蒙古所殺士卒殲焉永錫慶壽軍聞之皆潰歸四月蒙古攻曹州濟陰令馬驤死之五月承暉以救不至仰藥死蒙古入燕宮室爲亂兵所焚火月餘不滅蒙古輦其府庫之寶北去金祖宗神御及諸妃嬪皆淪沒蹂躪盡忠不肯與承暉同死又不護妃嬪潛携愛妾先遁見金主於南京仍以爲平章政事十月盡忠坐謀逆與其兄吾里也誅之是月夏人取臨洮蒙古兵攻潼關克遂自嵩山趨汴兵敗乃還遼東宣撫使蒲鮮萬奴稱帝改元四年四月山東紅襖賊首郝定僭號陷滕單諸州萊蕪新泰等十餘縣河北行省侯瑒討擒之

衆猶弗靖九月蒙古攻代州經略使奧屯醜和尚死之
十月蒙古攻潼關節度使泥厓古蒲魯虎死之十二月
蒙古攻平陽大名諸郡節度使吳僧哥護遷朔州民死
之改明年爲興定元年金比年多難宋不復遣使輸幣
已啓兵端丞相术虎高琪懼蒙古見逼欲南侵以避之
且疆土多沒於蒙古而欲于宋取償力排羣議以導其
主於是遣將分道侵宋宋隨下詔伐金互有勝負是冬
蒙古命太師木華黎圖金建行省于燕雲木華黎乃自
中都南攻遂城及蠡州下之又東擊齊定臨淄登萊等
州而去二年二月金兵圍棗陽焚大散關四月金兵陷

西和成階諸州八月蒙古將木華黎復攻陷河東州郡
行省李韋守將從坦烏古論德升兀顏訛出虎納合蒲
剌都先後死之是冬金主遣使求和于宋至淮中流不
納而返自是和好遂絕金主命其太子守緒會兵南渡
三年金兵大舉犯西川淮西諸州郡事詳寧宗本紀二
月夏人破葭州之通泰砦金刺史紇石烈王家奴戰沒
四月金知真定府事武仙與蒙古將張柔戰于滿城
敗柔乘勝攻中山府仙遣別將兩戰俱敗柔威名震于
河朔自深冀以北鎮定以東三十餘城望風降附五月
金汴京裏城畢丁初金主以京城闊遠難守故從木虎

高琪議竭公私之力築之琪自執政擅權固寵忌功嫉能惟以精兵屯駐河南苟且歲月而河北日陷不復救援金主父知其姦會琪令奴殺其妻復殺奴以滅口事覺下琪獄殺之金主嘗曰亂天下者彖多高琪二人也抹撚盡忠原名彖多云十一月蒙古攻晉安府守將帖割貞與府官十餘人皆死之四年正月蒙古徇霍州刺史移刺阿里合節度副使孔祖湯等皆死之二月設諸路三公府原爲招撫經略安撫節度等使者竝就封公爵鎮之於是封王福等凡九公竝兼宣撫使賜號宣力忠臣總帥本路兵馬署置官吏徵斂財賦賞罰號令皆

得便宜行之五月蒙古破兗州節度使元顏畏可死之
八月恒山公武仙以真定降蒙古九月宋遣兵會夏人
共圍鞏州不克而還十月蒙古復徇霍州進士賈邦獻
被執欲以爲鎮西元帥不屈自殺五年五月蒙古取東
平唐州守將訛論與宋兵戰大敗死者七百人匿之而
以捷聞十月蒙古合夏兵取葭州徇綏德州十二月蒙
古下潼關京兆閏月又徇鄜州守將完顏六斤紇石烈
鶴壽蒲察妻室女奚烈資祿皆死之紅襖賊夜入蒙城
縣屠掠而去改明年爲元光元年二月遣將訛可時金
伐宋由全倡議也三月渡淮攻固始縣破廬州將焦田

軍由鄧州赴汴京蒙古主自白波渡河薄鄭州元帥馬
伯堅以城降防禦使烏林答咬住死之汴京戒嚴議者
謂裏城不可守外城不可棄金主乃決計守外城脩樓
櫓增兵甲兩省軍與蒙古戰於三峰山軍大潰聲如山
崩將校多戰沒合達陳和尚楊沃行走鉤州城破皆死
阿蒲就執尋亦死自是金兵不復振是月改元開興
潼關守將李平以關降蒙古許州軍變殺元帥古里甲
王倫粘合全周蘇椿等以城降蒙古二月慶山奴謀走
歸德遇蒙古兵徐帥完顏兀里戰死慶山奴被執使招
京城不從睢州刺史張元壽棄城從慶山奴皆死之蒙

古徇臨渙攝縣令張若愚死之數日蒙古兵至盧氏縣
關陝行省總帥兩軍及秦藍帥府軍棄潼關而東遇蒙
古兵于鐵嶺天大雪士卒困憊完顏重喜降蒙古斬于
馬前都尉劫苗膺降不從殺膺携其首以降於是士卒
大潰行省徙單元典納合合閏奔匿山間被執皆殺之
秦藍總帥府經歷商衡不屈死之蒙古圍汴十六晝夜
內外死者以百萬計蒙古將速不臺知不可取乃為好
語講和金遂遣使出酒炙犒兵賂以珍異四月速不臺
退軍河洛改是年為天興元年詔上書不得言聖汴京
解嚴七月金飛虎卒申福等擅殺蒙古行人唐慶等三

十餘人于館金主不問和議遂絕九月再括京城粮匿者治罪貧富俱困連日有箭射入宮中書姦臣姓名十一月河解元帥趙偉襲據陝州以叛殺行省阿不罕奴十刺以下二十一人誣諸人以反狀金主不能直其事仍授偉行總帥府事偉尋歸蒙古是時亳州鎮安軍鎮防軍徐州義勝軍宿州鎮防軍相繼殺逐官吏易主帥語在劉均王賓傳十二月蒙古遣使約宋伐金金主出奔以右丞相賽不平章白撒等帥諸軍扈從留參知政事元顏奴由元帥崔立等守京城金主東行由陳留抵黃鄆堦遂幸河北速不臺知金主棄汴復帥師圍之二

年正月金主濟河會大風後軍不克濟蒙古將回古乃
追擊于南岸金將完顏猪兒賀都喜死之完顏兀論降
兵士溺死者千人金主次于溫麻岡遣白撒攻衛州白
撒聞蒙古王自河南渡河遂退師蒙古將大天澤以騎
兵踵其後戰于白公廟金兵敗績白撒棄軍東遁金主
進至魏樓村猶欲俟蒙古兵至決戰俄白撒至倉皇言
我軍已潰北兵已逼請幸歸德金主遂與副元帥合里
合等六七十人夜登舟狼狽入歸德翌日諸軍始聞金主
棄師遂大潰白撒之往衛州也所過縱兵四掠哭聲滿
野一飯之費數十金公私皇皇民如思昨故衛城堅

而敵兵之追無來援者金主暴其罪并其子皆賜死籍其家以散將士特速不臺攻汴城急內外不通米升至銀二兩殍死相望縉紳士女多行乞于市民有嫁妻飽一餐者至有自食其妻子者金主遺后弟徙單四喜奉御木甲塔失不至汴迎兩宮人情益不安元帥崔立與其黨韓鐸藥安國等因舉兵爲亂殺二相宗顏奴申習捏阿不等諭百姓曰二相閉門無謀今殺之爲汝一城生靈請命衆皆稱快立遂勒兵入宮集百官以母后命召衛王子從恪爲梁王監國自稱左丞相都元帥尚書令百官遷擢有差開封判官李禹翼棄官去戶部主事

鄭著召不起點檢溫敦阿里完顏阿散御史大夫裴蒲
阿虎帶諫議大夫烏古孫奴申戶部尚書完顏珠頤員
外郎聶天驥奉御忙哥講議淮察琦並死之立遂赴速
不臺軍以城降旣還城盡燒樓櫓速不臺益信其實降
也立性淫狡託以軍前索隨駕官屬軍民子女立聚之
省中親閱日亂數人猶不足復禁民間嫁娶括京城財
兩宮值變不果行四喜以其妻兒顏氏荅失不以其父
咬住奪門而出至歸德金主怒誅之二月蒙古忒木解
帥兵圍亳州是月知歸德府事石益女魯懼議散護衛
兵就糧他州留元帥蒲察官奴忠孝軍四百五十人都

尉馬用軍二百八十餘人于城中三月忒木剌兵日薄歸德官奴請北渡河再圖恢復女魯懽阻之官奴又邀金主如海州金主不從官奴本輕馬用起於小校又以金主信任忌之積忿謀爲亂以忠孝軍攻殺馬用女魯懽與左丞李蹊等三百餘人俱被害軍士死者三千人官奴提兵見金主謂女魯懽等反臣殺之矣金主不得已暴女魯懽罪人咸寃之官奴遂權參知政事以金主居照碧堂禁諸臣無一人敢奏對者金主日悲泣謂近侍曰自古無不亡之國不死之主但恨朕不知人爲此奴所囚耳四月陳州都尉李順兒殺行省粘葛奴申及

招撫使劉天起唐括送款于崔立崔立以金主母后王氏后徒單氏及梁王從恪荆王守純族屬男女五百餘人衍聖公孔元措名儒梁陟及三教醫流工匠繡女悉赴青城速不臺殺二王及族屬以后妃北還寶符李氏從至宣德州居訶摩院自縊於佛像前速不臺入汴遣兵先入立家取其妻妾寶玉以出立自外歸大慟而已城旣陷完顏族盡屠之初正大中大風落左掖門鴟尾壞丹鳳門扉天興初荆王守純府第產肉芝一株高五寸色紅津濡地成血臭不可聞剷去復生者再夜則房榻間羣狐號鳴秉燭逐捕則失所在蓋亡國之兆云是

月鄧州節度使移刺瑗以其城叛右司郎中白華將命
蒞鄧州召兵入援瑗既拒命與俱亡入宋五月蒲察官
奴襲敗蒙古兵于亳州真拜參知政事金主以慶陽總
管烏古論鎬言欲如蔡州避敵適官奴自亳還告之官
奴嘗過蔡知不足備禦力陳不可至扼腕頓足意趣叵
測出號于衆曰敢言南遷者斬衆以官奴爲無君勸金
主早爲計金主遂與內侍宋珪等謀殺官奴六月官奴
及其黨阿里合白進皆伏誅赦忠孝軍以安反側遂決
策遷蔡中京留守烏林答土棄城奔蔡城遂陷總帥彊
伸死之金主發歸德值久雨扈從宰執而下徒行泥水

中撥青棗爲糧數日足脛盡腫至毫從行纔二三百人馬五十疋而已避雨雙溝寺中蒿艾滿目無一人迹金主太息曰生靈盡矣爲之一慟至蔡父老羅拜於道見儀衛蕭條皆感泣金主亦歛歛久之然離敵差遠商販稍集金主意頗安命修見山亭爲遊息之所又遣宋珪與總管烏古論鎬之妻選室女備後宮右丞忽斜虎並切諫金主罷工役所選皆聽自便只留識文義者一人八月宋遣兵會蒙古將塔察兒取唐州九月金主遣使如宋乞糧諭使人曰宋人負朕深矣蒙古滅國四十以及西夏夏亡及於我我亡必及於宋若與我連和所以

爲我者亦爲彼也卿其以此曉之至宋宋不許重九日
蒙古兵突至城下再援戰蒙古兵不利乃築長壘圍蔡
是月徐州守將郭恩殺逐官吏以叛行省竇不死之十
一月宋遣將孟珙江海兵二萬運米三十萬石助蒙古
攻蔡十二月宋兵決柴潭蒙古兵決練江並入汝水破
外城旬日又合攻破西城金主謂侍臣曰我自知平生
無大過惡死無恨矣所恨祖宗傳祚至我而絕與自古
荒淫暴亂之君等爲亡國獨此爲介介耳又曰亡國之
君往往爲人囚繫或爲俘獻或辱於階庭閉之空谷朕
必不至於此是時諸將多戰歿其砲軍總帥王銳殺元

帥夾谷當哥率衆降蒙古三年正月戊申金主遜位于
元帥承麟改元者三凡十年守緒本庸才所任將相如
高汝礪則欺君固位白撒徒單兀典慶山奴則奢縱貪
鄙闖亂盈朝近習干政而播越苟安殊乏臥薪嘗膽之
志亡國自身惡得無罪但不惜一死庶合禮耳承麟立
謚曰哀宗

承麟者劾里鉢之後白撒之弟也天興三年正月己酉
承麟卽帝位亟出捍敵而南面已立宋幟已而四面呼
聲震天地南面守者棄門走孟珙招江海塔察兒之兵
以入忽斜虎帥十餘兵巷戰不能禦守緒還取寶土真

于幽蘭軒環以草自縊死忽斜虎亦赴汝水死將士從
死者五百人承麟退保子城聞守緒死帥羣臣入哭奠
未畢而城潰諸禁近舉火焚之江海入宮執參知政事
張天綱孟珙與塔察兒分守緒骸骨及寶玉法物以歸
承麟爲亂兵所殺凡歷九主傳國百十有九年而亡

宋史新編卷一百九十四